

Գեանջի (Գանձակի) դաշնադրութիւնը կապելուց յետոյ՝ Բագուն կրկին անցաւ պարսից իշխանութեան ներքոյ. Նադիրը նշանակեց այդ տեղ իւր կողմից կառավարիչ: Նադիրի մահից յետոյ Բագունայ ղեկավարը դարձաւ Նադիրի իշխաններից մէկը Միրզա Մահամէդ խան, որին յաջորդեց նորա որդի Մելիք Մուհամէդ խանը, որը ամուսնացել էր Ղուբայի Ֆեթալի խանի քրոջ հետ և ստիպուած էր ճանաչել խանի իրաւասութիւնը, և հարկ տալ նորան, մասնակցել նորա կատարած արշաւանքներում: Այդ արշաւանքների ժամանակ Մելիք խանը քիչ էր մնացել զոհ գնար Ազուշենցիների զայրոյթին, որոնք ջարդել էին Աւարի խանին իւր զնդով. նա ազատուեց շնորհիւ Ֆեթալի խանի մերձաւորների և պատսպարուեց Բագում, երբ հալածւեց Քեովդուշանցի Ուսմիա Էմիր Խամզայի ձեռամբ, բայց քաղաքի ամուր պարիսպները նորան փրկեցին, Ուսմիյը աւերելով Բագունայ խանութեան մի մասը հեռացաւ դէպի Գերբենդ 1779 թ.:

Մելիք խանը արգելք դրեց (բանտարկեց) ռուս վաճառականների և նոցա ապրանքների վրայ նորա համար, որ լեզգիների ձեռով երկու տղայք էին փախցրած Բագունից և վաճառած էին Հաշտարխանում և մի միայն գեներալ Եակոբի վերադառնալուց յետո՝ յաջողուեց մէկ վաճառականի ազատել այդ վիճակից:

Մէլիք Մուհամմէդ խանի մահից յետոյ նորան յաջորդեց իւր երիտասարդ որդին Միրզա Մուհամմէդ խանը, որից գահը իւրեց իւր հօրեղբայրը Մուհամմէդ Ղուլի խանը: Միրզա Մուհամմէդը փախաւ Ղուբայ, ուր և մնաց, թէպէտ Գերբենդի Շէյխ Ալի խանը աշխատում էր, որ նորան վերադարձնեն օրէնքով պատկանող հողերը: Իմ Ղուբայի ծանօթ Աբաս Ղուլի խանը յառաջացել է այդ գահազուրկ Բագունայ տիրապետողի տոհմից:

Բագունայ վերջի խանն էր Հիւսէյին Ղուլի խանը, որը իւր չարագործութեան մեծ անունը թողել է պատմութեան մէջ:

Նա 1796 թ. երգւեց հաւատարիմ լինելու Ռուսաստանին և ուղարկելով պատգամաւորներ Պետերբուրգ, ինքը գաղտնի յարաբերութիւն ունէր Պարսկաստանի հետ. ճնշում և կողոպտում էր ռուսաց վաճառականներին և մի միայն 1800 թ. երբ երեւեցան զինուորական նաւերը, վճռեց բաւարարութիւն տալ, հարստա-